

San Blas, gotzaina eta martiria OTSAILAREN 3an

Sarrera oharra

Ondo etorri, senideok, san Blas gotzain martiriaren liturgia honetara.

Ez gaitezan geratu hariak eta jakiak bedeinkatze hutsean. Haren bizitza Jainkoa goresteko izan zan lez, odola isurtzeraino, bilatu daiguzala geuk ere Jainkoa aintzaltzeko bideak, harengandik hain urrun gagozan aldiotan.

Sarrera abestia

Aita baten semeok,
sinismen bakar bat
dogunok,
anai artean batu garanok,
kantuz gatoz,
kantuz zugana, Jauna.

*Seme gara, bai, baina
seme izaten ba ete dakigu?
Anai gara, bai, baina
anai izaten ba ete dakigu?
Seme izatera, anai izatera,
Jauna,
heldu nahi dogu.*

Abadearen agurra

† Aitaren eta Semearen eta Espiritu santuaren izenean.
—Amen.

† Jaungoikoak bere Semearen jarraitzaileak, Santuak, emoten deuskuz jarraibide eder. Haren grazia eta bakea zuekin.

—Eta zure espirituarekin.

Damu-otoitza

Senideok: Blas gotzain martiria eredu emoten deuskun

Jainko Aitaren aurrean autortu daigun gure sinismen epelkeria eta aho zikina, eta hartu daigun haren errukiaren babesa:

- Jesus Jauna, ahotsa Jainkoa goraltzeko dala gogoratzen deuskuzuna: *Erruki, Jauna!*
- Jesus Jauna, Jainkoaren erreinua iragarri zeuzkuna: *Kristo, erruki!*
- Jesus Jauna, Erreinua iragartera bialtzen gaituzuna: *Erruki, Jauna!*

Erruki dakigula Jainko guztiz ahaltsua, eta gure pekatuak parkaturik eroan gaizala betiko bizitzara.

—Amen.

Otoitza

Entzun, Jauna, zeure herriari,
Blas martiri santua lagun dogula, egiten dogun otoitza,
lur honetan bakearen poza
eta gero betiko bizia lortzeko laguntza izan daian.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta errege bizi da-eta gizaldi eta gizaldietan.

Jr 1, 4-9

Jainkoak aukeratuak garala jakiteak bildurtu egiten gaitu; lotsaz bizi izan geintekenez. Baina argi euki behar dogu Jainkoak ez deuskula huts egingo, eta ez dala geurea, berea baino, bizi izan behar doguna.

Nik nora bialdu, hara joango zara.

Jeremias Profetaren liburuaren hasiera (Jr 1, 4-9)

Honan berba egin eustan Jaunak:

«Amaren sabelean sortu aurretik aukeratu zindudazan; jaio aurretik sagaratu zindudazan eta profeta izentatu, nire mezua herriei iragartzeko».

Nik erantzun neutsan:

«Ai, Jainko Jauna!

Gazteegia naz ni eta ez dakit berba egiten».

Baina Jaunak esan eustan:

«Ez esan gazteegia zarala.

Nik nora bialdu, hara joango zara;

Nik zer agindu, ha esango dozu.

Ez izan jentearen bildur,

zeugaz izango nozu-eta, zu libratzeko

-dino Jaunak-».

Orduan Jaunak eskua luzatu eta ahoa ikutu eustan, esanez:

«Neure berbak ipintzen deusudaz ahoan».

Jaunak esana.

Erantzun salmoa (Sal 116)

Salmo honetan iragarriko doguna da gure eginbeharra: Barri Ona iragartea geure bizikereaz, ez bakotxa bere arima salbatzen ahalegintzea. Ulertuko eta onartuko ete dogu?


R/. Zoaze mundu guztira, eta iragarri Barri Ona.

Goratu egizue Jauna, nazino guztiok,
goratu egizue, herri guztiok. R/.

Sendoa da-eta guretzat haren maitasuna,
beti-betikoa Jaunaren leialtasuna. R/.

Mk 16, 15-20

Lehentasan lez Jainkoaren erreinuaren iragarpena bizi dauanak ez deutso ezeri bildurrik izango, eta askatasunean bizi izango da. Entzun ebanjelioan, harrerea Aleluia abestuz eginda, zutunik.



Aleluia.

V/. Zoaze eta egin herri guztiak nire ikasle, dino
Jaunak,
eta Ni zeuekin izango nozue egunero
munduaren azkenera arte. R/.

*Zoaze mundu guztira
eta iragarri Barri Ona izaki guztiei.*

✠ Jesu Kristoren Ebanjelioa San Markosen liburutik (Mk 16, 15-20)

Aldi haretan, Jesusek Hamaikei agertu eta esan eutsen: «Zoaze mundu guztira eta iragarri Barri Ona izaki guztiei». Sinistu eta bateatzen dana salbatuko da; sinisten ez dauana, barriz, kondenatuko. Sinisten dabenek seinale honeek izango ditue lagun: nire izenean deabruak botako ditue, berbeta barrietan berba egingo dabe, sugeak eskuetan hartuko ditue eta, edari hilgarriren bat edanda be, ez deutse kalterik egingo; gaixoei eskuak ezarriko deutsiez eta osatu egingo dira».

Holan berba egin ostean, Jesus Jauna zerura jaso izan zan eta Jainkoaren eskumaldean jesarri zan. Hareek, barriz, alde guztietara joan ziran Barri Ona iragartzera. Eta Jauna bera ebilen hareekin, egiten ebezan mirarien bidez berbea egiaztatzen ebal.

Jaunak esana.

Jainko Herriaren otoitza

Jainkoa hainbeste madarikatzen dan herrialdean, san Blasen bedeinkapenak eskatzen doguzanak hartu daigun gogotan gure eztatia Jainkoa goraltzeko erabili geikela, eta, ondasunak, senideen onerako:

—Eleizearen alde: bedeinkapenez blaitu daizan bere seme-alaba guztiak, bai eta *egoera ez legezkoetan* diranak ere, *eskatzen deutsugu, Jauna*.

—San Blasen bedeinkapenera abiatu garanok gure eztarria Barri Ona iragarteko, eta ondasunak senideen onerako erabili daiguzan, *eskatzen deusugu, Jauna*.

—Gure Planeta hain ostikokatua ikusten dogun hau zaintzen ahalegindu gaitezan, gure kontsumoa murriztuz eta plastikoa saihestuz, *eskatzen deusugu, Jauna*.

—Gure eleiz alkarteen beherakadeak arduratu gaizan, eta, euretan, bakotxa bere lekua bilatzen ahalegindu gaitezan, eskuzabaltasunez, *eskatzen deusugu, Jauna*.

Beti onesten gaituzun Jainko Aita: egizu, bokazinodun lez jokatu daigula san Blas martiriaren urratsei jarraituz eta haren bedeinkapenaz. Jesu Kristo gure Jaunaren bitartez.

—Amen.

EUKARISTIAREN LITURGIA

Eskeintza

Bedeinkatua zu, Jauna, zero-lurren Jainkoa, zeure esku za-baletik hartu ditugu orain ekarri deusuguzan ogi-ardauok, lurraren indarrak eta gizakiaren lanak sortuak: honeexek egingo jakuz biziaren ogi ta betiko zorionaren edari.

- *Bedeinkatua zu, Jauna, orain eta beti.*

Senideok: egin daigun otoitz, guztiok batean, Eliza oso-aren oparia Jaungoikoari eskintzerakoan.

- *Jainkoa goresteko eta gizakiak salbatzeko.*

Oparien gainekoa

Isuri egizu, Jauna, zeure bedeinkazinoa
gure emoitza honeen gainera;
zure maitasunak sutu gaizala,

maitasun horren indarrez garaitu zituan-eta
Blas gotzain martiri santuak bere gorputzeko oinazeak.
Jesu Kristo gure Jaunaren bitartez.

Prefazioa

V./ Jauna zuekin..... R./ Eta zure espirituarekin
V./ Gora bihotzakR./ Jaunagan daukaguz
V./ Eskerrak Jaungoiko gure Jaunari...R./ Egoki da eta zuzen.

Egoki da, bai, eta zuzen, bidezko eta salbagarri,
nonahi eta beti guk Zuri eskerrak emotea,
Jauna, Aita guztiz santu,
Jainko ahalguztidun betiko horri.
Kristori jarraituz, Blas gotzain martiri santuak
zure izena autortzeko isuri eban odolak
argi erakusten ditu zure miragarriak:

gure makaltasunean zeure ahalmena agertzen dozu
eta indartsu egiten indarrik bakoa,
zure testigu izan dadin,
Jesu Kristo gure Jaunaren bitartez.

Horregaitik, zeruko indar guztiekin,
lurrean beti eta beti goresten zaitugu,
Zuri, Jainko guztiz handi horri,
eten barik [esanez] kantatuz: Santu, santu, santua...

III. Eukaristi-Otoitza

Santu zara, bai, Jauna,
eta diran guztiek emoten deutsue behar dan gorespena.
Zure Seme Jesu Kristo gure Jaunaren bitartez
eta Espiritu Santuaren indarrez,
Zeuk biziazoten dituzu guztiak eta santutzen
eta Zeuk diharduzu beti eta beti zeure herria batzen,

eguzkialde batetik besteraino
opari garbia eskeini dakizun.

Apalik, beraz, Jauna, eskatzen deutsugu:
egin daizuzala santu, zeure Espirituaren indarrez,
oparitako ekarri ditugun ogi-ardao honeek,
zure Seme Jesu Kristo gure Jaunaren
Gorputz eta † Odol egin daitezan,
misterio honeek berak agindurik egiten ditugun ezker.

Berak, saldu eben gau haretan,
ogia hartu eta, Zuri eskerrak emonez,
bedeinkatu eban,
zatitu eta bere ikasleei emon eutsen, esanez:
HARTU EIZUE ETA JAN GUZTIOK HONETATIK:
HAU NEURE GORPUTZA DA-ETA,
ZUENTZAT EMONGO DANA.

Era berean, afalondoan, kaliza harturik,
Zuri eskerrak emonez, bedeinkatu eban
eta bere ikasleei emon eutsen, esanez:

HARTU EIZUE ETA EDAN GUZTIOK HONETATIK:
HAU NEURE ODOLAREN KALIZA DA-ETA,
ITUN BARRI ETA BETIKOAREN ODOLA,
ZUENTZAT ETA ASKORENTZAT
PEKATUAK PARKATZEKO ISURIKO DANA.
EGIZUE HAU NEURE OROIGARRI.

Hau da sinismenaren misterioa.

Hil eta biztu zarala, Jauna,
Zu barriz etorri arte, hau dogu, hau, barri ona!

Horregaitik, Jauna, guk,
zure Semearen nekaldi salbagarria eta hilen artetik biztea
eta zeruratze miragarria gogoratuz,
haren azken etorrera itxaroten dogula,
Zuri eskerrak emoteko eskeintzen deutsugu

sakrifizio bizi eta santu hau.

Begira, Jauna, zeure Eleizearen eskeintza honi;
ikusi eskeintza honetan
Zurekin baketu gaituan Jesu Kristoren oparia;
egizu, Jauna, zure Semearen Gorputza eta Odola
hartzen ditugunok,
Espiritu Santuaz beterik, Jesu Kristogan
gorputz bat eta espiritu bat izan gaitezala.

Berak egin gaizala Zuretzat betiko opari,
zure aukeratuekin zerua jaritsi daigun:
lehenengo, Maria guztiz dohatsua,
Jainkoaren Ama beti Birjinarekin,
haren senar Jose santuarekin,
zure Apostolu eta martiri santuekin,
Blas Gotzain martiri santuarekin eta santu guztiekin;
badakigu, honeen bitartez
zure laguntza izango doguna nonahi eta beti.

Gu Zurekin baketzen gaituan opari hau izan bedi, Jauna,
mundu guztiarentzat bake eta salbamen.

Mundu honetako ibilaldian,
bete egizu sinismenez eta maitasunez zeure Eleizea:
zeure zerbitzari Frantzisko gure Aita Santua,
Joseba gure Gotzaina,
beste gotzain eta eleizgizon(-emakume) guztiak
eta zeurea dozun herri osoa.

Entzun, bihotz onez,
zeure aurrera deitu dozun familia honen otoitzak;
Aita guztiz ona, erakarri Zeugana
mundu zabalean banaturik dabiltzan zeure seme-alabak.

† Hildako gure senideak (...),
eta mundu honetatik Zurekin adiskide joan diran guztiak,
hartu eizuz bihotz onez zeure zeruan;
geuk ere sinisten dogu

zure aintzaren zorion betea izango dogula betiko,
eurekin batean, Jesu Kristo gure Jaunaren bitartez;
beronen eskuz emoten deutzazuz
ondasun guztiak munduari.

HONEN BITARTEZ, HONEKIN ETA HONENGAN
ZURI, AITA, JAUNGOIKO AHALGUZTIDUN HORRI
ESPIRITU SANTUAREKIN BATEAN
OSPE TA AINTZA GUZTIA
GIZALDI TA GIZALDI GUZTIETAN.

—Amen.

Salbatzaileak agindu ta irakatsiari jarraituz
bildur barik esan dagigun.

GURE AITA zeruetan zarana
santu izan bedi zure izena,
etor bedi zure erreinua,
egin bedi zure nahia
zeruan bezela lurrean ere.
Emoiguzu gaur
egun honetako ogia;
parkatu gure zorrak
geuk ere geure zordunei
parkatzen deutsegun ezkerro;
ez eiguzi itzi tentazinoan jausten,
baina atara gagizuz gatxetik.

† Atara gagizuz, Jauna, gatx guztietatik,
emoiguzu bakea gure egunotan,
zure errukiari esker
pekatutik gabi bizi izan gaitezan
eta estualdietan sendo;
betiko zorionaren itxaropenean,
Jesukristo gure Salbatzailea
noiz etorriko dan zain gagozela.

- Zeurea dozu erregetza;

zeureak ospe ta indarra orain eta beti.

BAKE ESKEINTZEA (Abadeak)

† Jesukristo gure Jauna, zeuk esana da apostoluei 'bakea izten deusuet, neure bakea emoten'; begira zure Eleizearen sinismenari eta ez gure pekatuei, eta zeure gogoa danez, emoiozu eleizeari bakea, emon batasuna, errege bizi zara-ta, gizaldi eta gizaldietan. - *Amen.*

† Jaunaren bakea beti zuekin
- *Eta zure espirituarekin.*

† Emoiozue bakea alkarri.

Jaungoikoaren Bildotsa,
zeuk kentzen dozu munduko pekatua: *Erruki, Jauna.*

Jaungoikoaren Bildotsa,
zeuk kentzen dozu munduko pekatua: *Erruki, Jauna.*

Jaungoikoaren Bildotsa,
zeuk kentzen dozu munduko pekatua: *emoiguzu bakea*

JAUNARTZEA

† Hona hemen Jainkoaren Bildotsa, hona munduko pekatua kentzen dauana: zoriotsuak honen mahaira deituak:

—Jauna, ni ez naz inor zu nire etxean sartzeko,
baina esaizu hitz bat eta osatuko naz.

Jaunartzean

Hemen gaituzu, Jauna, ogiaren eske,
bizi behar honetan ahuldu bait gintezke.
Zure gorputz santua hartu nahi genduke:
zu barik bizitzerik ezingo genduke.

Munduak behar badau eguzki-argia,
mendiko abereak, iturri garbia;
besteok nahi badogu barruko bizia
beharrezkoa jaku zeruko ogia.

Jauna, zure grazia lagun dakigula,
ogi hau jan dagigun behar dan bezela;
Ez ahaztu txarrerako jarriak gaozela:
arren, zuzen ta leial bizi gaitezela.

Jaunartze ondorengoa

Hartu dogun Eukaristiak indartu gaizala, Jauna,
Blas gotzain martiri santua indartu eban lez,
bai zure zerbitzuan leial agertzeko,
bai bere nekaldian sendo irauteko.
Jesu Kristo gure Jaunaren bitartez.

Amaiera agurra

Blas gotzain martiri santuak Barri Ona iragarteko adorea
izan eban, eta Izadira eta pobreengana hurreratu zan,
Jainkoa bere bizikereaz goretsiz.

Haren bedeinkapena daroagunok ezin geikeo hutsik
egin: erabili daigun eztarria Jainkoa goraltzeko eta Barri Ona
iragarteko, eta ondasunak besteen bizitza alaitzeko.

Azken onespena

† Jauna zuekin.

—*Eta zure espirituarekin*

† Bedeinka ta gorde zaizela Jainko ahalguztidunak:

Aitak eta Semeak † eta Espiritu Santuak.


—*Amen.*

Kanta	Jaunari	kantu	Gora Jainkoa zeruetan,
barri,			goratu danok eleizetan,
kanta guztiok herriz-herri,			goratu baita aingeruek
kanta Jaunaren izenari,			eta goratu lurrekoek.

mundu guztia poz-kantari.

† Zoaze Jaunaren bakean.

—Eskerrak Jaungoikoari.



Egoki da, bai, eta zuzen, bidezko eta sal-ba-ga-ri, no-na-hi eta

beti guk Zuri eskerrak e-mo-te-a, Jauna, Aita guz-tiz san-tu,

Jainko ahalguzti - dun be - ti - ko ho-ri. Kris-to-ri jarraituz,

Blas martiri san-tu-ak, zure izena autortzeko isuri eban o-do-lak

argi erakusten ditu zu-re mi-ra - ga-ri-ak: gure makaltasunean

zeure ahalmena agertzen do-zu-la-ko, eta indartsu egiten indarrik

ba - ko - a, zeure testigu izan da-din, Jesu Kristo gure Jau - na-

ren bi-tar-tez. Horregai-tik, zeruko indar guz-ti-e-kin, lurrean

beti eta beti goستن zai-tu - gu, Zuri, Jainko guztiz handi ho-ri,

e - ten ba - rik kan-ta - tuz: